

四庫全書

史部

欽定四庫全書

明會典卷四十二

禮部一

綱領

諸司職掌

尚書侍郎之職掌天下禮儀祭祀宴享貢舉之政令其屬有四曰儀部曰祠部曰膳部曰主客部

後改儀部為儀制祠部為祠祭膳部為精膳主客仍舊

俱稱清吏司

儀制清吏司

諸司職掌

郎中員外郎主事掌貳尚書侍郎舉其儀制而辨其名數

朝賀

國初朝賀等儀多仍前代之舊其後屢詔刪定立為中制以頒示天下具見于諸司職掌若職掌所不及載者或雖載而後復有所損益者今備列于後

正旦冬至朝賀儀

諸司職掌

一凡正旦冬至前一日尚寶司陳設御座于奉天殿及  
寶案于御座之東設香案于丹陛之南教坊司設中和  
韶樂于殿內之東西北向其日清晨錦衣衛陳鹵簿儀  
仗于丹陛及丹墀之東西設明扇于殿內東西列車輅  
步輦于丹墀東西相向鳴鞭四人左右北向教坊司陳  
大樂于丹陛之東西北向儀禮司設同文玉帛案于丹

陛之東金吾衛設護衛官于殿內及丹陛之東西陳甲士于午門外奉天門外及丹墀東西錦衣衛設將軍于奉天門外丹陛丹墀及奉天門列旗幟于奉天門外東西典牧官陳仗馬犀象于文武樓南東西相向欽天監設司晨郎報時位于內道東近北立糾儀御史二人于丹墀北東西相向內贊二人于殿內外贊二人于丹墀北東西相向設傳制宣表等官位于殿內東西相向鼓初嚴文武官具朝服齊班于午門外鼓次嚴引禮官引百

官由左右掖門入詣丹墀東西北向立鼓三嚴執事官詣華蓋殿伺候內官跪奏皇帝具袞冕陞座鐘聲止儀禮司官跪奏各執事官行禮贊五拜禮畢贊供事執事官各就位儀禮司官跪奏請陞殿駕興中和韶樂奏聖安之曲尚寶官捧寶前行導駕官前導扇開簾捲尚寶官置寶于案樂止鳴鞭報時雞唱曉對贊唱排班班齊贊禮唱鞠躬大樂作贊四拜平身樂止典儀唱進表大樂作給事中二人詣同文案前導引序班舉案由東門

入置殿中樂止內贊唱宣表目宣表目官跪宣訖俯伏  
興唱宣表展表官取表宣表官至簾前外贊唱衆官皆  
跪宣表訖內外皆唱俯伏興平身序班即舉表案于殿  
東外贊唱衆官皆跪代致詞官跪于丹陛中致詞云具

官臣某茲遇

正旦則云三陽開泰萬物咸新  
冬至則云律應黃鍾日當長至

恭惟皇帝

陛下膺乾納祐奉天永昌賀訖外贊唱衆官皆俯伏興  
樂作四拜興平身樂止傳制官詣御前跪奏傳制俯伏  
興由東門靠東出至丹陛之東西向立稱有制贊禮唱

跪百官皆跪宣制

正旦則云履端之慶  
冬至則云履長之慶

與卿等同之贊

禮唱俯伏興平身樂止贊搢笏鞠躬三舞蹈贊跪唱山  
呼百官拱手加額曰萬歲唱山呼曰萬歲唱再山呼曰  
萬萬歲凡呼萬歲樂工軍校齊聲應之贊出笏俯伏興  
大樂作贊四拜平身樂止儀禮司官跪奏禮畢中和樂  
作奏定安之曲駕興尚寶官捧寶導駕官前導至華蓋  
殿樂止引禮官引百官以次出

萬壽聖節百官朝賀儀



諸司職掌

一凡萬壽聖節百官朝賀禮儀與正旦冬至同但致詞云恭惟皇帝陛下萬壽令節臣某等誠懼誠忤敬祝萬萬歲壽不傳制

事例

洪武三十年奏更朝賀儀同文案玉帛案俱由殿東門舉進安于殿中宣表訖舉同文案玉帛案俱安于寶案之南令節改稱聖節

朝賀儀

洪武間定

以後樂俱同

殿內中和韶樂

樂器

麾一

簫十二

笙十二

排簫四

橫笛十二

篳篥四

塤四

琴十

瑟四

編鐘二

編磬二

應鼓二

祝一

敔一

搏拊二

陞殿

樂章

聖安之曲

乾坤日月明  
八方四海慶  
太平龍樓鳳閣中  
扇開簾捲

帝王興聖感天地靈保萬壽洪福增祥光旺氣生陞寶  
位永康寧

公卿入門

後不用

樂章

治安之曲

忠良為股肱昊天之恩承主恩森羅拱北辰御爐香遠  
奉天門江山社稷興安天下軍與民龍虎會風雲賀萬  
壽聖明君

丹陛大樂

後奏于  
奉天門

樂器

麾一

戲竹二

簫十二

笙十二

笛十二

頭管十二

箏八

琵琶八

二十絃八

方響二

鼓二

拍板八

杖鼓十二

百官行禮

樂章

萬歲樂

雨順風調昇平世萬萬年山河社稷八方四面干戈息  
慶龍虎風雲會

朝天子

聖德聖威洪福齊天地御堦前文武兩班齊擺列在丹

墀內舞蹈揚塵山呼萬歲統山河壯帝畿禮儀讚稽慶  
龍虎風雲會

還宮

樂章

定安之曲

九五飛聖龍千邦萬國敬依從鳴鞭三下同公卿環珮響  
玎璫掌扇護御容中和樂音呂濃翡翠錦綉擁還華蓋  
赴龍宮

中宮正旦冬至命婦朝賀儀

諸司職掌

凡正旦冬至前期一日女官陳設御座于宮中設香案于丹墀之南其日清晨內官陳設儀仗于丹陛之東西及丹墀東西女官擎執者立于御座之左右陳女樂于丹陛東西北向設箋案于殿東門外設班首拜位于中道之東西設命婦拜位于丹墀北向設司贊位于丹墀東西設司賓位于命婦班之北東西相向設內贊二人



位于殿內東西命婦至宮門外司賓引命婦入就拜位  
女官見服侍班如常儀尚宮尚儀等官詣內奉迎尚儀  
奏請陞座皇后具服出導從如常儀樂作陞座樂止司  
贊唱班齊樂作贊四拜樂止外贊唱進箋引箋案女官  
前導舉箋案女官二人舉案由殿東門入樂作至殿中  
樂止贊衆命婦跪內贊唱宣箋目宣箋目女官宣訖興  
唱宣箋展箋女官詣案前取箋宣箋女官宣訖興舉案  
者舉案于殿東贊命婦皆興司賓引班首由東階陞樂

作自東門入至殿中樂止內贊唱跪班首跪衆命婦皆

跪班首稱某夫人妾某氏茲遇

正旦則云履端之節  
冬至則云履長之節敬詣

皇后殿下稱賀內贊司贊同唱興班首及殿外命婦皆

興司賓引班首由西門出降自西階樂作至拜位樂止

贊拜樂作四拜樂止司言前跪將旨由東門靠東出至

于丹陛東西向立稱有旨司贊唱跪衆命婦皆跪司言

宣旨

正旦則云履端之慶  
冬至則云履長之慶

與夫人等同之贊興衆命婦

皆興司贊唱拜樂作四拜樂止尚儀跪奏禮畢皇后興

樂作還宮樂止引禮引命婦以次出

中宮千秋節命婦朝賀儀

諸司職掌

一凡中宮千秋節命婦朝賀禮儀與正旦冬至同但致詞云茲遇千秋令節敬詣皇后殿下稱賀不傳旨

朝賀女樂

樂器

戲竹二

簫十四

笙十四

笛十四

頭管十四

簫十

琵琶八

二十絃八

方響六

鼓五

拍板八

杖鼓十二

樂章

天香鳳韶

寶殿光輝晴天映懸玉鈎珍珠簾櫳瑤觴舉時簫韶動

慶大筵來儀鳳昭陽玉帛齊朝貢讚孝慈賢助仁風歌  
謠正在昇平中謹獻上齊天頌

太皇太后正旦冬至命婦朝賀儀

皇太后正旦冬至命婦朝賀儀

儀注俱與前同

朝賀女樂

樂器俱與前同

樂章

天香鳳韶

龍樓鳳閣彤雲曉開綉簾天香芬馥瑤堦春暖千花簇  
壽聖母齊頌祝御筵奏獻長生曲坤道寧品類咸育和  
氣四時調玉燭享萬萬年太平福

東宮親王并妃正旦冬至宮中朝賀儀

洪武初定其日上位中宮陞乾清宮御座待從導引如  
常儀引禮引皇太子及妃親王及妃詣上位前贊禮贊  
鞠躬四拜皇太子親王皆鞠躬四拜平身皇太子妃及

親王妃皆四拜贊禮引皇太子詣前贊跪皇太子跪引  
禮贊跪皇太子妃諸王及妃皆跪皇太子稱長子某茲

遇

履端之節  
履長之節

謹率諸弟某等欽詣父皇陛下稱賀贊禮

贊俯伏興平身皇太子俯伏興平身引禮贊俯伏興平  
身諸王皆俯伏興平身皇太子妃諸王妃興贊禮引皇  
太子復位贊鞠躬四拜皇太子諸王皆鞠躬四拜興平  
身皇太子妃親王妃皆四拜禮畢引禮引皇太子及妃  
諸王及妃詣中宮前贊禮贊鞠躬四拜皇太子親王皆

鞠躬四拜興平身皇太子妃親王妃皆四拜引禮贊皇太子詣前贊跪皇太子跪引禮贊跪皇太子妃諸王及妃皆跪皇太子稱長子某茲遇

履端之節  
履長之節

謹率諸弟某

等恭詣母后殿下稱賀贊禮贊俯伏興平身皇太子俯伏興平身引禮贊俯伏興平身諸王皆俯伏興平身皇太子妃親王妃興贊禮引皇太子復位贊鞠躬四拜皇太子親王皆鞠躬四拜興平身皇太子妃親王妃皆四拜禮畢引禮引皇太子親王及妃皆出洪武七年更定



不致賀詞止行八拜禮東宮親王正旦冬至朝賀太后儀同前

東宮正旦冬至朝賀儀

諸司職掌

一凡正旦冬至日典璽官設東宮座于文華殿中錦衣衛設儀仗于殿外東西教坊司陳大樂于文華門內東西北向府軍衛列甲士旗幟于門外錦衣衛設將軍十人于殿中門外及文華門外東西相向立儀禮司官

設箋案于殿東門外設文武官拜位于文華門外設傳  
令宣箋等官位于殿內東西執事官先行四拜禮訖各  
就位引禮引各官詣文華門外北向立儀禮司官啓請  
陞座導引官奉迎東宮具冕服出樂作陞座樂止贊禮  
唱班齊鞠躬樂作四拜興平身樂止唱進箋給事中前  
導箋案由殿東門入置殿中內贊唱宣箋目宣訖俯伏  
興平身唱宣箋外贊唱跪展箋官詣案前取箋宣箋官  
宣訖內外皆贊俯伏興平身即舉案于殿東外贊唱衆

官皆跪代致詞官中道跪致詞云具官臣某等茲遇

旦正

則云三陽開泰萬物咸新冬至則云律應黃鍾日當長至敬惟皇太子殿下茂膺景

福賀畢唱衆官皆俯伏興平身傳令官跪啓傳令由東

門左出至丹陛東西向立稱有令贊衆官皆跪宣令

旦正

云履端之節冬至云履長之節同臻嘉慶贊俯伏興樂作四拜平身樂

止儀禮司官跪啓禮畢

東宮千秋節百官朝賀儀

諸司職掌

一凡東宮千秋節百官朝賀禮儀與正旦冬至同但致詞云茲遇皇太子殿下壽誕之辰臣某等敬祝千歲壽不傳令

朝賀樂

朔望朝參同

樂器

戲竹二

簫四

笙四

笛四

頭管四

簫二

琵琶二

二十絃二

方響一

鼓一

拍板二

杖鼓六

陞殿 還宮 百官行禮

樂章

千秋歲

堯年舜日勝禹周慶雲生繚繞鳳樓風調雨順五穀收

萬民暢歌謳

東宮妃正旦冬至命婦朝賀儀

洪武間定

前期女官陳設東宮妃座于宮中南向至日清晨內官  
陳設儀仗于丹陛之東西及丹墀之東西贊禮女官設  
外命婦班位于丹墀重行北向設贊禮位于丹墀之東  
西設引禮二人位于外命婦班之北東西相向設內贊  
女官二人位于宮內之東西外命婦既至宮門引禮引  
命婦入就拜位侍衛者侍班如常儀尚儀入閣啓東宮

妃服禮服以出侍從如常儀樂作陞座樂止贊禮贊班  
齊樂作贊四拜外命婦皆四拜樂止引禮引班首由西  
階升樂作自西門入進當座前北向立定樂止內贊贊  
跪班首跪贊禮贊跪外命婦皆跪班首致詞云某國夫  
人某等茲遇

履端之節  
履長之節

敬詣皇太子妃殿下稱賀內贊

唱興外命婦皆興引禮引班首由西門出復至拜位贊  
禮贊四拜外命婦皆四拜平身樂止尚儀啓禮畢皇太  
子妃興樂作還宮樂止引禮引外命婦以次出

聖節正旦冬至王府慶祝儀

見王國禮

聖節正旦冬至天下司府州縣慶祝儀

洪武間定

凡遇正旦冬至聖誕之辰各處司府州縣官於公廳齋

沐各具公服行禮

後改用朝服

告天祝壽曰某衙門某官臣

某等荷國厚恩叨享祿位皆賴天生我君保民致治今

茲

正旦冬至聖旦

聖壽益增臣等下情無任欣躍感戴之至

聖節正旦冬至蕃王慶祝儀

見蕃國禮



明會典卷四十二

# 欽定四庫全書

史部

明會典卷四十三至

詳校官編修臣張謙

編修臣程嘉謨覆勘

總校官知縣臣繆琪

校對官主事臣陳大樞

謄錄監生臣鄭泰

欽定四庫全書

明會典卷四十三

禮部二

朝儀

朝儀見諸司職掌者有京官常朝儀若午朝朔望朝其儀與常朝稍異至於謝恩見辭以及諸司奏事入朝門禁等項亦合從朝儀類

京官常朝儀

諸司職掌

一凡朝班序立公侯序於文武班首次駙馬次伯自一品以下各照品級文東武西依次序立風憲糾儀官居下朝北紀事官居文武第一班之後稍近上便於觀聽不許攙越如有事奏須要從班末行至御前跪奏不許於班內橫過奏畢即便入班序立

一凡文武百官於御前侍坐遇有大小官員奏事必須起立候奏事畢復坐不許倨坐失儀如有特旨賜坐則

復坐

一凡文武百官出入朝門各照品級第加遜敬如一品以下官遇公侯駙馬加敬禮立則旁立行則後從三品四品官遇一品官加遜禮行立俱後從五品以下官倣此俱不許攬越失儀如有宣召不在此限

一凡百官朝參遇有聖諭教戒須要專心致意拱聽分明即便省身克已不許放肆

一凡百官御前奏對務必從實知則為知不許妄對

一凡大小官員隨從上位行丹墀身常朝北不許南向或左或右環轉隨侍如上位陞奉天門及丹陛其隨從官員不得徑行中道并王道如有旨令行方許於側邊隨行

一凡官員入朝門須要拱手端行威儀整肅不許私揖及吐唾不敬

一凡文武百官於奉天華蓋武英等殿奏事必須穿著履鞋方許入殿違者從糾儀御史禮部儀禮司官糾劾

送法司如律

事例

洪武初令文武百官朝叅奏事有未閑禮儀者凡新任官及諸武臣侍儀司官每日於午門外演習御史二人監視有不如儀者糾舉百官入朝失儀者亦糾舉如律凡早朝文官自左掖門入武官自右掖門入如奉天門朝至金水橋南各依品級東西序立候鳴鞭訖以次隨行至丹墀內東西相向序立守衛官先行禮畢東西序

立文武官入班行禮有事者以次進奏無事奏者隨即入班朝退捲班分東西出如華蓋殿朝至鹿頂外東西序立鳴鞭訖守衛官至鹿頂內行禮訖就侍立位各衙門官以次行禮訖有事奏者入奏無事奏者四品以上及應陞殿者入殿內侍立五品以下官出至鹿頂外列班北向立候鳴鞭以次出如奉天殿朝俱于華蓋殿行禮奏事畢五品以下官詣丹墀依品級列班重行北向立四品以上及翰林院官給事中監察御史等官於中



左中右門伺候鳴鞭各詣殿內序立候朝退捲班以次  
出如先於奉天殿朝後却奏事者文武官於丹墀內依  
品級重行北向立候鳴鞭行禮訖四品以上及翰林院  
官給事中監察御史等官陞殿侍立五品以下仍前序  
立候謝恩見辭人員行禮訖鳴鞭捲班退有事奏者於  
奉天門或華蓋殿進奏無事奏者以次出 凡朝班每  
日都察院輪委監察御史二員侍班糾察失儀 凡百  
官早朝入班行禮及朝退捲班俱分文東武西不許徑

越御道東西行走如在奉天門朝其有事東西往來者  
出至金水橋南行過 凡官員人等入內府合行門道  
須從邊行不得當中行如東門近東邊行西門近西邊  
行其門東西相向者近南邊行 凡百官遇雨雪免朝  
有事奏者不拘此限入朝遇雨雪許服雨衣 凡百官  
既具朝服公服之後毋舉笏行私揖禮 凡朝退燕閒  
及行幸處文職三品以上武職二品以上及勲舊文學  
之臣賜坐其餘非奉特旨不許輒坐 凡賜坐不許推

讓坐後遇有顧問初時跪對畢即坐若復有所問坐朝上對不必更起同列侍坐或被顧問一人奏對餘皆靜聽毋攙言勦說如各有所見候其人言畢方許前陳

凡入朝行立坐食去處不許談笑諠譁指畫窺望凡

朝叅近侍病嗽者許即退班或一時眩暈及感疾不能侍立者許同列官掖出凡執政大臣年高者取自特

旨免朝倘有顧問於便殿賜坐凡奉天殿丹陛中三道階級并奉天門中三道階級皆不許人行百官由東

西階行傳制遣使持節進表等儀皆由東階出入隨駕  
傘扇儀仗由正門中道兩旁出入 凡殿廷頒降詔書  
冊命從中道中門出近東而行其內外官員贊捧御製  
文字及御用之物進呈不許直行中道或左或右取便  
以行至御前正中跪進先祿寺進御膳等物亦不可當  
中道直行許於正道邊左以進 凡御坐處即為正道  
如上御奉天門則於正門邊東入將至御前正中供具  
膳畢而出亦如之若上常所往來處其奉御內侍捧執

御用之物聽使令者皆須近後取便左右行不許隨後  
徑馳中道 二十二年詔奉天殿常朝五府六部都察  
院通政司錦衣衛大理寺等官於殿內侍立奏事止於  
華蓋殿 二十四年定侍班官員凡文武官除分詣文  
華殿啓事外如遇陞殿各用履鞋照依品級侍班有違  
越失儀者從監察御史儀禮司糾劾東班則六部堂上  
官各子部掌印官都察院堂上官十二道掌印御史通  
政使司大理寺太常寺太僕寺應天府翰林院春坊光

祿司欽天監尚寶司太醫院五軍斷事官及京縣官西班則五軍都督及首領官錦衣衛指揮各衛掌印指揮給事中中書舍人又令本部置百官朝班序牌大書品級列丹墀左右木柵之上文武百官照品序立侍班又令凡朝參將軍先入近侍官員次之公侯駙馬伯又次之五府六部又次之應天府及在京雜職官員又次之有不如儀從監察御史及儀禮司糾劾二十九

年令凡有宣諭大小百官于丹陛前或奉天門各照品

級序立候上御座跪聽聖訓 永樂初令內閣官員侍

朝立在全臺東錦衣衛在西後移下貼御道東西對立

景泰三年令師保兼官品同者立班以衙門為次

天順三年奏准凡方面官入朝遞降京官一班序立

成化十三年奏准文武官員入朝大臣常川許帶官吏

頭目每人二名若遇陰雨大臣添一人小官許帶一人

各執雨具 十四年令朝叅官員遇鼓起之時俱于左

右掖門外拱候東西班次照依衙門品級序立其進士

各照辦事衙門次序立于見任官後

午朝儀

事例

景泰初定凡午朝上御左順門先期內官設御座於左順門之北設案稍南文武執事奏事等項官員俱于左掖門內伺候駕出視朝各官照班次序立內閣并五府六部奏事官六科侍班官俱於案西序立侍班御史二員序班二員將軍四員俱於案南面北立鴻臚寺鳴讚



一員於案東面西立錦衣衛鴻臚寺堂上官於奏事官班以次面東立管將軍官并侍衛官立於將軍之西五府六部等衙門官照依衙門次第出班奏事通政司官照依常例引人奏事三法司官遇有奏事俱隨班其常日答應內刑部大理寺郎中等官各一員答應都察院侍班御史答應其餘衙門官有事者分管答應鴻臚寺官贊奏事畢徹案各官退各衙門如有機密重事許赴御前具奏

朔望朝儀

事例

洪武三年定凡朔望日上皮弁服御奉天殿百官公服於丹墀東西對立俟引班引合班北面立再拜班首詣前同百官鞠躬唱某官臣某起居贊禮唱聖躬萬福班首平身復立同百官皆再拜引班引百官分班仍對立省府臺部官諸衙門有事奏者由西階陞殿奏事畢降自西階引班引百官以次出如無事奏則侍儀由西階

陞殿跪奏知之俟侍儀降階引班導百官出十四年  
定凡朔望日文武百官各具朝服俟鼓三嚴公侯一品  
二品官入東西角門俟其餘三品以下先於丹墀內班  
橫行序立鐘三鳴公侯一品二品以次入班序立鐘鳴  
畢儀禮司奏外辦導駕官導上位陞御座鳴鞭訖鳴贊  
唱班齊通贊詣中道班首臣某等起居聖躬萬福畢百  
官行五拜禮儀禮司奏禮畢而退十七年令凡遇朔  
望免行起居禮後更定凡朔望日上御奉天殿陞座

鳴鞭文武百官各具公服於丹墀內侍立鴻臚寺官贊  
排班樂作百官行一拜三叩頭禮畢樂止分東西侍立  
俟鴻臚寺奏謝恩見辭禮畢鳴鞭駕退 凡朔望日文  
武百官朝退詣文華殿門外分東西侍立俟皇太子陞  
殿樂作百官行一拜禮其謝恩見辭官員人等亦隨班  
行禮禮畢以次出

百官朝見禮儀

諸司職掌

一凡朝見稽首頓首五拜乃臣下見君上之禮先拜手  
稽首四拜後一拜叩頭成禮稽首四拜者百官見東宮  
親王之禮其見父母亦行四拜禮其餘官長及親戚朋  
友相見止行兩拜禮

常朝君父之禮

諸司職掌

一凡各王大臣朝行八拜禮常朝一拜叩頭禮凡伯叔兄  
見天子在朝行君臣禮於便殿內行家人禮伯叔兄坐

東面西坐受天子四拜伯叔兄就於受禮位坐天子居正中南面坐所以尚親親之義以存君臣之禮

一皇后父見上行君臣禮后見父母行家人禮皇太子見皇后父母皇太后母立于東西向皇太子立于西東向行四拜禮皇后父母立受兩拜答兩拜

事例

洪武二十九年定凡各王來朝具冕服見天子畢次見東宮引禮官導王由文華門東門入至文華殿前西向

立東宮冕服執大圭詹事府等官六員導駕出陞座東  
宮官左右侍從引禮官引王就拜位贊禮官贊四拜禮  
東宮坐受畢東宮及王俱衣常服敘家人禮引禮官請  
王由殿東門入至後殿各王東坐西向東宮面東贊禮  
官贊四拜禮王坐受如東宮與王敘坐東宮正中南面  
坐各王東西敘坐 凡諸王見皇后父母亦行四拜禮  
皇后父母立受 凡王於妃父母前行禮王立於東西  
向妃父母立於西東向王行四拜禮妃父母立受兩拜

卷五十三  
答兩拜其餘親屬見王行四拜禮王皆坐受妃於父母  
前行四拜禮父母正面立受其餘親屬見妃各敘家人  
禮

官員人等謝恩見辭儀

事例

洪武間定

謝恩

除授文武官員



文武官員調除

文武官員為事免罪

文武官員欽賞鈔物等件

文武官員給親完聚

旗軍奏准給親完聚

旗軍欽賜鈔物等件

文武官員欽蒙賜祭安葬

武官替職欽依放回官員

歲貢生員入監

試職官實授

文武官欽免稅糧

軍人陞充總小旗

文武官員患病欽賜醫治

官吏准免重役放回

文武官欽授誥勅

免謝恩

撥過各衙門吏典

旗軍調撥別衛

見

欽取致仕官員

在外文武官員到京公幹

在京文武官員公幹回還

外國進貢人員

各處舉到孝廉人材秀才

歲貢生員

各處糧長進圖冊等項

各處官吏生員起復

各處文官給由

各處軍官到京聽差

各處吏典承差禮生到京公幹

各處耆宿糧長軍民人等奏事

在京武官征進取回

文武官員為事降調到京

各處僧道醫術舉到

官員監生舉姻省親病痊回還

舍人監生旗軍差往各處公幹回還復命

免見

在京文武官員患病痊可

各處取到農吏土民

各衙門吏典承差考滿

僉補校尉力士尉役

外衛旗軍管解人物到京

辭

文武官員赴任

文武官員到京公幹回還

文武官員往各處公幹

文武官員回家祭祀遷葬

武官替職回還

外國官軍聽差回衛

外國進貢人員回還

官員監生回家畢姻省親

行人舍人監生差往各處公幹

免辭

各處糧長進圖冊回還

外衛旗軍聽差回衛

旗軍差往各處公幹

各處吏典承差禮生到京公幹回還

凡早朝謝恩見辭人員都察院輪委監察御史二員侍班  
凡謝恩者居先見者次之辭者又次之俱行五拜三叩  
頭禮 凡內外諸司文武官員已入流者謝恩見辭必具  
公服行禮 凡朝覲進表箋官員見辭謝恩俱用公服如  
面除而不及具服即時謝恩者勿拘其或常服見者綴班  
後如以軍務遠來及承制使還即時引見者不在此例  
凡在外諸司遣人來朝及朝使還京者俱先朝見後詣所



司否者以違制論 永樂六年奏准在外軍民官司及各王府公差人員在京公侯駙馬伯都督及內官出使隨帶人員并各衛所等衙門公差人等到京除例該引見者照舊外其不在常例者俱赴鴻臚寺報名謝恩見辭本寺將各人姓名附簿仍將各起總數每日早另具題本進呈及引各人于承天門外行叩頭禮 二十二年令凡方面大臣來朝鴻臚寺即皆引見 宣德九年令在外各衙門官吏人等該謝恩者許在本處望闕謝恩其有事赴京朝見

待有明文方許 成化間奏准凡謝恩見辭應該鴻臚寺報名官員俱用報單或親自赴寺或差人遞報各從其便 凡病痊官員舊例免見以後惟文官四品以上及翰林院學士尚寶司六科都給事中武官公侯伯都督及駙馬儀賓錦衣衛指揮等官患病過三日者俱公服于午門外行朝見禮若大臣曾蒙遣醫調治并賜物慰問者行禮後仍面謝大臣考滿有賜者同

諸司奏事儀

事例

洪武三年定凡百官奏事皆跪有旨令起即起進退皆以次無得攙越 凡諸儒臣於御前奏事或進呈文字恐有口氣體氣須退立二三步毋輒近御案立須于東西隅不得直前 凡上位行立去處諸人不得輒便奏事跪拜必俟坐定方許奏事行禮俱要取便北向 十年令羣臣自今大小政事先啓皇太子處分然後奏聞 十四年定啓事東宮者皆稱臣 二十五年令凡差

使人員除王府并軍前差到及緊要軍務奏聞外其各衙門催辦公事勾軍提人等項復命人員如有事務不完等項該科批寫緣由送各該衙門一應編號手本送該科皆不必煩奏 二十八年定各衙門奏啓事目

五軍都督府合奏啓

軍情

機務

守衛門禁等事

修築城池改設衛所

賞賜

馬匹關換轉銷等項

提問軍職

整點大軍

官員房屋

調撥官軍及陞調隊伍

內外軍官奔喪遷塋祭祀

旗軍併鎗陞用

月報為事軍官

官軍有弟姪兒男為事充軍告完聚

關領軍器

給配為奴人口告給聚

提取邊境恩軍

查理軍士回話

軍官替職未及六十歲者各都司年終回銷未

完勘合官吏

還鄉老幼軍屬

首告收藏軍器

知在原告患病在逃病故

五軍所屬在京衛分凡奏啓事務除軍中機密  
事情及守衛門禁關防等事不分官旗軍人許  
令徑奏其餘合行事務俱由該府具奏施行

吏部合奏啓

除授官員陞調改除黜陟

開設革併衙門

襲爵封贈

誥勅散官

土官承襲

致仕官員

貼黃

給由起復考覈給假官員



監生問事吏員書寫告出仕

放回事故人材秀才

官員人等告侍親殘疾

送問五品以上官員

起取人材秀才

官員復姓更名

官員告極刑

吏告重役

京官并問事書寫人告丁憂

進人材秀才冊

戶部合奏啓

歲奏會計稅糧馬草

改撥糧儲

賑濟饑民

賞賜

水旱災傷

拋荒田土除豁稅糧

攢運邊方糧儲

調撥官軍屯種

為事官軍告免追該扣俸糧

給散煎鹽工本

預備糧儲

提問在外五品以上官員在京官員

原告病故拖欠并侵盜錢糧追徵無納

歸併州縣點閘戶口

欽給官民房屋田地

各處盤點糧斛

禮部合奏啓

賞賜

軍官祭祀

建言

表箋

災異

旌表

科舉

四夷進貢

鑄降印信

罷閒事故生員

雨澤

日月交食

厯日

館待賓客

侍親

遣官祭祀

為格為例

冠婚喪祭

外國請求

考究禮儀制度

厨役告事故

下程鈔錠

僧道度牒

兵部合奏啓

選用軍職陞調襲替除降等項

軍務

誥勅封贈

馬政送收關換整點調撥

優給

貼黃

符驗

陞用總小旗

整點大軍

開設衙門

優給軍役等項

調撥官軍



整理驛傳

投充力士校尉

軍職官員家人投軍

軍官軍人告給正軍

垛集首報查理軍士

旗軍勘合由帖

給賞

軍官復姓更名

原告逃故

護衛軍旗及邊衛恩軍有犯提取

提問軍職并在京文職及在外文職五品以上

官

刑部合奏啓

追問黨逆

處決重囚

犯法軍官

送問并伸訴回話等項

首黨逆原告實引賞發落犯人涉虛抵罪疎放  
被誣者

提問軍職并在京文職及在外五品以上官

各衙門盤獲犯屬

提邊遠恩軍

病故原告并被問軍官

追贓不足家屬

鄉縛民害等項得實引賞原告發落犯人

抄割入官馬騾

編發恩軍工役囚人進冊

工部合奏啓

水利水害

修築河岸橋道

在外修理城池衙門公廨倉廩等項營造支用

官物差撥軍民人匠

在京在外衛所營造及修理船隻關支一應物料

成造軍器軍裝

關支軍器

賞賜

收買牛隻農具

各處差人解納銅鐵等項顏料門上秤折

起差均工人夫

提到工役故因補役戶丁告單丁田糧重大老疾及有充軍

在京住坐倉脚夫老疾告回原籍

都察院合奏啓

處決重囚

追贓不足家屬

追問并伸訴回話

追問黨逆

病故原告及軍官相視

抄劄等項入官馬騾

賞賜

犯法軍官

點差御史

提取邊軍

提問軍職并在外文職五品以上官在內京官

大理寺合奏啓

引奏軍官

日奏審過刑名月奏囚數

軍官應合襲蔭子孫并授封祖父母父母妻有犯

駕前將軍力士校尉有犯重罪并二次犯罪者  
文職官類奏逐日先將發審奏本奏送該科公  
文立案回報該衙門先將其餘人數依律發落  
有司人流官員類奏



覆奏重刑

各衙門二次審異三次擬罪不當或將易於歸  
結事理淹禁日久致令原告并平人身死及問  
事顛倒是非并發審奏本不如式等項送問原  
問官吏

五軍斷事官合奏啓

追問黨逆

送問并伸訴回話

軍官原告患病及病故

提問軍職并在外文職五品以上官在內京官

抄劄等項入官馬驛

給賞

犯法軍官

提取邊軍

處決重囚

追贓不足家屬

十二衛合奏啓

內除軍中機密事情及守衛門禁關防等事不  
分官旗軍人許令徑奏其餘合行事務自下而  
上俱由本衛具奏

軍中機密事情

守衛門禁等事

整點大軍

馬匹關撥轉銷等項

關支一應賞賜

官員房屋

調撥官軍隊伍

官員奔喪遷葬祭祀

關領軍器

還鄉老幼軍屬

旗軍併鎗陞用

首告收藏軍器

月報官軍馬騾

給配家小

凡不合奏啓止呈該衙門施行

軍官替職

勾補逃亡事故等項軍士

病故軍職官員

老疾不堪應役無丁旗軍

還官賞賜鹽糧

倒死馬騾驢肉贓

軍官缺員

貼黃給

誥出姓更名

缺首領官吏

幼軍收充正軍

老軍代役

收受倉糧草料放支等項錢糧文卷差錯遺漏

送法司

奸盜詐偽人命鬪毆相爭一切詞訟連狀送斷  
事官理問如有干碍軍職斷事官具奏提問

二十九年令朝班奏啓事務除五府六部都察院通政  
司斷事官十二衛照依定例具本奏啓其餘官員軍民  
人等若有事奏儀禮司打點六科給事中各一員每日  
於午門外照依該管事務總收奏狀入奏監察御史一  
員公同看視其有不經由各該官員將自己瑣碎事務

徑自奏啓紊煩者罪之 又定奏事次第凡早朝上御  
奉天門百官行叩頭禮畢分東西班序立儀禮司依次  
贊某衙門奏事奏畢復入班候諸司奏完儀禮司贊奏  
事畢退出其奏事次第一都督府二十二衛三通政司四  
刑部五都察院六監察御史七斷事司八吏部等五部  
九應天府十兵馬司十一太常寺十二欽天監若太常  
寺奏祭祀則在各衙門之先 凡早朝上御奉天華蓋  
謹身殿奏事百官行叩頭禮畢近侍官及監察御史陞



殿侍班其奏事官俱陞殿分東西班立儀禮司依次贊  
某衙門奏事奏畢各官以次退出其餘官員不陞殿者  
俱於中左中右門外兩廊伺候奏事官出則皆出若於  
文華殿啓事則詹事府在先餘依奏事次第 凡晚朝  
惟通政司六科給事中守衛官奏事各衙門有軍情重  
事許奏餘皆不許 三十年令通政司許早晚朝奏事  
及有軍情重事不時入奏其各衙門凡有一應事務止  
於早朝大班內奏啓不許朝退又將瑣碎事務於右順

門題奏 永樂四年令六部及近侍官有事當商畧者  
皆於晚朝陳奏 七年令大寒早朝上御奉天門百官  
行叩頭禮侍班候鴻臚寺官引謝恩見辭行禮畢駕興  
御右順門內便殿百官有事奏者以次入奏無事者退  
治職務自十一月朔日為始其朔望如常儀 八年令  
各衙門行過事件誤違舊制者許其改正具本送該科  
不必面奏 二十二年令諸司有急切機務不得即面  
陳者許具題本封進其餘大小公私之事並於公朝陳

奏 正統七年令凡看牲及遣祭官遇聖駕陞殿俱於  
殿中復命若御奉天門視事亦於百官未行禮之先復  
命 景泰一年令午朝翰林院先奏事 成化元年令

一應奏題本有旨意者六部都察院等衙門抄出即明  
白覆奏發落不許稽緩若過五日不覆奏者該科以聞

凡在京文武衙門奏題本謹封完備俱差屬官捧入  
左順門進呈 凡每日早朝各衙門并公差官員具本  
面奏及通政司類進本狀各具手本備開所奏事件送

禮科收照次日將收到奏目并各衙門送到奏題本狀  
通具奏目送司禮監交狀以候類進

忌辰朝儀

輟朝儀附

事例

凡各廟忌辰永樂元年奏定前二日上服淺淡衣服御  
西角門視事不鳴鐘鼓不行賞罰不舉音樂禁屠宰文  
武百官各服淺淡衣服黑角帶朝參宣德三年令凡遇  
忌辰通政司禮部兵馬司免引囚奏事十年又定奉天

門視事弘治十四年奉旨今後但遇忌辰朝叅官不許  
穿紵絲紗羅衣服恭仁康定景皇帝恭讓章皇后忌辰  
如遇節令穿青綠花樣正月初三日宣宗章皇后忌辰  
如遇太常寺奏祭祀許穿紅衣服凡親王公主郡王及  
文武大臣喪輟朝各有日數先期本部具奏仍出告示  
於長安左右門至日早朝不鳴鐘鼓不鳴鞭不設儀仗  
文武百官各服淺淡顏色衣服烏紗帽黑角帶於奉天  
門朝叅其謝恩見辭官員亦不用公服皆如常朝官服

色

入朝門禁

事例

洪武十一年

詔朝參文武官給領牙牌懸帶出入無牌者依律論罪  
借者及借與者罪同在外來朝官於各門附名出入

二十一年令朝參官員門籍各衙門自置 景泰三年  
令官員人等至皇城四門下馬牌邊橫過俱下馬其順

行不係橫過不在禁例 成化間令文武官員公差患病等項呈堂出印信手本填註門籍候病痊及公差回還之日仍用手本開註 又令文武大小官員入朝跟隨辦事官吏人等照出午門例于長安左右門承天門端門各下小木牌進入出則收回 弘治七年令長安等門不許閒雜之人出入賣物穿走違者許糾儀等官及守門官軍舉奏

諸司朝覲儀

事例

凡天下諸司朝覲官自十二月十六日為始鴻臚寺官陸續引見二十五日以後每日常朝方面官入至奉天門前隨班行禮畢於文班內序立視常朝官品級各降一等知府知州知縣及諸司首領官吏土官衙門把事土吏人等俱於午門外行禮畢東西分班序立正月初一日大朝會以後方面官於奉天殿前隨班序立知府以下奉天門金水橋南仍分東西序立其行禮俱如常



朝儀

諸蕃朝貢

諸司職掌

一凡蕃王來朝先遣禮部官勞于會同館次日于奉天  
殿朝見上位蕃王服其國服若嘗賜朝服者則服朝服  
行八拜禮禮畢即詣文華殿朝見皇太子行四拜禮見  
親王亦行四拜禮親王立受兩拜答兩拜其從官隨蕃  
王班後行禮凡遇宴會蕃王班次各居公侯伯之下如

蕃王朝見之後遇有恩賜及蕃國遣使朝貢皆如常朝

儀

詳見蕃國禮

東宮朝儀

事例

永樂二年定文武官員常朝行叩頭禮畢三師三少詹  
事府官左右春坊官翰林院官鴻臚寺官六科給事中  
錦衣衛官左右序立於文華殿門之外鴻臚寺序班通  
事舍人引文武百官於丹陛上丹墀內東西序立照依

衙門資次啓事監察御史二員司直郎清紀郎日輪二員北向侍立糾儀啓事畢百官齊退及有召文亦須前項官員一同進出如獨進并獨員留後者許監察御史鴻臚寺官司直郎清紀郎糾覈一合啓事務在京衙門止用奏本在外衙門務要奏本一本啓本一本其詹事府主簿錄事同春坊司直郎清紀郎司諫分為六科將本內啓過事件同六科給事中逐一奏聞主簿錄事司直郎清紀郎司諫仍於司禮監共關揭帖開寫逐日啓

過本內事件畧節緣由六科給事中亦具題帖各另奏  
進

明會典卷四十三

欽定四庫全書

明會典卷四十四

禮部三

登極儀

國初定

吳元年丞相率文武百官各具公服進表引禮官引班首捧表從奉天門入至丹墀執事官舁表案于丹陛上候班首置表于案給事中先于正殿設受表案于殿中

又設收表案于御座東殿中跪奏請陞殿上位陞殿樂作殿中又跪奏請陞御座上位陞御座樂止引禮官引班首率文武百官自西階分東西二路入班位立定通贊唱排班承傳唱排班通贊唱班齊鞠躬拜興拜興拜興拜興平身承傳唱如之通贊唱班首陞殿引禮官引班首自丹陛西階陞至丹陛中表案前搢笏捧表由正殿中門入宣表目官展表官宣表官同隨班首自殿西門入侍儀引班首至御座前當中內贊唱跪丞相跪通

贊唱衆官皆跪承傳唱如之內贊唱進表以表授執事者殿中跪受表置于殿中表案上班首出笏宣表目官先跪于班首西內贊唱宣表目宣畢宣表目官先興出殿宣表官展表官跪于班首東內贊唱宣中書省表文候宣畢給事中接表內贊唱以表復于案給事中受表復置殿中案收表于御座東表案宣表官展表官先興出殿內贊唱就拜興平身通贊唱就拜興平身承傳唱如之內贊唱復位侍儀引班首至殿西門引禮官自殿

西門外引班首降自西階入班通贊唱鞠躬拜興拜興  
拜興拜興平身承傳唱如之殿中跪奏禮畢請還宮通  
贊唱禮畢捲班百官以次出洪武元年園丘告祭禮畢  
校尉設金椅於郊壇前之東南向設冕服案於金椅前  
候望瘞畢丞相諸大臣率百官於望瘞位跪奏曰告祭  
禮成請即皇帝位羣臣扶擁至金椅上坐百官先排班  
執事官舉冕服案寶案至前丞相諸大臣奉衮冕跪進  
置于案上丞相等就取衮冕加于聖躬丞相等入班通



贊排班班齊鞠躬樂作拜興拜興拜興平身樂止百  
官拜興如之通贊唱班首詣前引禮官引丞相至上位前  
通贊唱跪搢笏丞相跪搢笏承傳唱衆官皆跪百官如之  
捧寶官開盃取玉寶跪授丞相丞相捧寶上言皇帝進登  
大位臣等謹上御寶尚寶卿受寶收入盃內通贊唱就拜  
興平身百官拜興如之通贊唱復位引禮官引丞相自西  
降復位通贊唱鞠躬拜興拜興平身搢笏鞠躬三舞蹈跪  
左膝三叩頭山呼山呼再山呼跪右膝出笏贊俯伏興平

身鞠躬拜興拜興拜興拜興平身皇帝解嚴通贊唱捲  
班百官退禮畢具鹵簿導從詣太廟奉上冊寶追尊四  
代考妣仍告祀社稷還具袞冕御奉天殿百官上表稱  
賀前期侍儀司設表案于丹墀中內道之西北設丞相  
以下百官拜位于內道上下之東西每等異位重行北  
面捧表官宣表官展表官位于表案之西東向糾儀御史  
二人位于表案之南東西相向宿衛鎮撫二人位于東西  
陛下護衛百戶二十四人位于宿衛鎮撫之南稍後知班

二人位于文武官拜位之北東西相向通贊贊禮二人  
位于知班之北通贊在西贊禮在東引文武班四人位  
于文武官拜位之北稍後皆東西相向引殿前班二人  
位于引武班之南舉表案二人位于引武班之北舉殿  
上表案二人位于西陞之下東向其丹陞上設殿前班  
指揮司官三員侍立位于陞上之西東向宣徽院官三  
員侍立位于陞上之東西向儀鸞司官位于殿中門之  
左右護衛千戶八人位于殿東西門之左右俱東西相

向鳴鞭四人位列于殿前班之南北向將軍六人位于殿門之左右天武將軍四人位于陛上之四隅皆東西相向殿上尚寶司設寶案于正中侍儀司設表案于寶案之南文官侍從班起居注給事中殿中侍御史尚寶卿位于殿上之東西向武官侍從班懸刀指揮位于殿上之西東向受表官位于文官侍從班之南西向內贊二人位于受表官之南東西相向捲簾將軍二人位于簾前東西相向是日清晨拱衛司陳設鹵簿列甲士于

午門外之東西列旗仗于奉天門外之東西龍旗十二  
分左右用甲士十二人北斗旗一纛一居前豹尾一居  
後俱用甲士三人虎豹各二馴象六分左右左右布旗  
六十四門旗日旗月旗青龍白虎旗風雲雷雨江河淮  
濟旗天馬天祿白澤朱雀玄武等旗木火土金水五星  
五嶽旗熊旗鸞旗及二十八宿旗各六行每旗用甲士  
五人一人執旗四人執弓弩設五輅于奉天門外玉輅  
居中左金輅次革輅右象輅次木輅俱並列丹墀左右

布黃麾仗黃蓋華蓋曲蓋紫方傘紅方傘雉扇朱團扇  
羽葆幢豹尾龍頭竿信幡傳教幡告止幡絳引幡戟麾  
戈麾儀鎗麾等各三行丹陛左右陳幢節響節金節燭  
籠青龍白虎幢班劒梧杖立瓜卧瓜儀刀鎧杖戟骨朵  
朱雀玄武幢等各三行殿門左右設圓蓋一金交椅金  
脚踏水盆水罐團黃扇紅扇皆校尉擎執侍儀舍人二  
人舉表案入就殿上鼓初嚴百官具朝服次嚴各依品  
從齊班于午門外以北為上東西相向通班贊禮及宿

衛鎮撫等官入就位諸侍衛官各服其器服及尚寶卿  
侍從官入鼓三嚴丞相以下文武官以次入各就位皇  
帝袞冕陞御座大樂鼓吹振作樂止將軍捲簾尚寶卿  
以寶置于案拱衛司鳴鞭引班引文武百官入丹墀拜  
位北面立初行樂作至位樂止知班唱班齊贊禮唱鞠  
躬拜樂作四拜興平身樂止捧表以下官由殿西門入  
內贊唱進表捧表官捧表跪進于案前受表官搢笏跪  
于案東受表置于案出笏興退立于殿內之西東向內

贊唱宣表宣表官詣案前搢笏取表跪宣于殿內之西  
展表官搢笏同跪展宣訖展表官出笏一人以表復置  
于案俱退立于位宣表官俯伏興同捧表以下官出殿  
西門降自西階復位贊禮唱鞠躬樂作四拜樂止唱搢  
笏鞠躬三舞蹈唱跪唱山呼各拱手加額呼萬歲者三  
樂工軍校齊聲擊鼓應呼之出笏俯伏興樂作四拜賀  
畢遂遣官冊拜皇后冊立皇太子以即位詔告天下

洪熙元年定宣德以後同



公侯駙馬伯文武百官及軍民耆老等上箋勸進者三  
令旨俞允乃命本部擇日具儀先期司設監等衙門於  
華蓋殿陳設御座於中仍於奉天殿設寶座欽天監設  
定時鼓尚寶設寶案於奉天殿鴻臚寺設表案於丹陛  
上教坊司設中和韶樂設而不作鴻臚寺設詔案及錦  
衣衛設雲蓋盤於奉天殿內東別設雲蓋於承天門上  
設雲輿於午門外設宣讀案於承天門上西南向是日  
早遣官祇告天地宗廟社稷上具孝服設酒果親自詣

大行皇帝几筵前祇告受命畢即於奉天殿前設香案  
酒果等物具冕服行告天地禮隨赴奉天殿謁告祖宗  
畢仍具袞冕詣大行皇帝几筵前行五拜三叩頭禮畢  
詣母后前行五拜三叩頭禮畢詣奉天殿即位是日早  
鳴鐘鼓錦衣衛設鹵簿大駕上服袞冕御華蓋殿文武  
百官各具朝服入丹墀內侯鴻臚寺引執事官進至華  
蓋殿行禮畢贊各供事贊請陞殿上由中門出陞寶座  
錦衣衛鳴鞭文武百官上表稱賀上命百官免賀免宣

表止行五拜三叩頭禮畢百官出至承天門外俟翰林院官貫詔書用寶訖鴻臚寺官請頒詔翰林院官捧詔授禮部官由奉天殿左門出錦衣衛於午門前候捧詔置雲蓋中導至承天門開讀行禮如常儀

明會典卷四十四

欽定四庫全書

明會典卷四十五

禮部四

冊立一

皇后冊立儀

洪武初定

遣使冊立

前期一日內使監設御座于奉天殿如儀尚寶卿設御

寶案于御座前侍儀司設冊寶案之南冊東寶西設奉  
節官位于冊案之東設掌節者位于奉節官之左稍退  
俱西向設承制官位于奉節官之南西向設奉冊奉寶  
官位于冊寶案之西東又設使副受制位于橫街之南  
北向東上設承制官宣制位于使副受制位之北西向  
設奉節官奉冊奉寶官位于使副東北西向又設使副  
受冊寶褥位于受制位之北北向典儀二人位于丹陛  
上之南東西相向贊禮二人位于使副受制位之北東

西相向知班二人位于贊禮之南東西相向設文武百官侍立位于文武樓之北東西相向文武侍從班位于殿上之左右引文武班舍人四人位于文武官之北稍後東西相向引禮二人位于使副之北東西相向拱衛司宣徽院官對立位于奉天殿門之左右東西相向將軍二人位于殿上簾前東西相向將軍六人位于奉天門之左右東西相向又將軍四人位于丹陛上之四隅東西相向又將軍六人位于奉天殿門之左右東西相

向鳴鞭四人位于丹陛上北向是日金吾衛陳設甲士儀仗于午門外之東西拱衛司陳設儀仗于丹陛丹墀之東西和聲卽設樂位于丹墀之南禮部設龍亭儀仗大樂于奉天門外正中以俟迎送冊寶至中宮質明鼓初嚴催班舍人催百官具朝服導駕官侍從官入迎車駕次嚴引班舍人引文武百官入就侍立位引禮引使副具朝服入就丹墀受制位諸執事者各就位三嚴侍儀奏外辦御用監奏請皇帝服袞冕御輿以出尚寶卿



前導侍從警蹕如常儀皇帝將出仗動大樂鼓吹振作  
至奉天殿升御座樂止尚寶卿以寶置于案捲簾鳴鞭  
報時雞唱訖禮部官捧冊寶各置于案奉節官承制官  
奉冊官奉寶官及掌節者各入就殿上位西向立定舉  
冊寶案四人入立于奉冊奉寶官之後典儀唱鞠躬樂  
作四拜平身樂止承制官進詣御座前跪奏請發皇后  
冊寶承制訖由中門出中陛降至宣制位稱有制典儀  
唱跪使副跪承制官宣制曰冊妃某氏為皇后命卿等

持節展禮宣訖由殿西門入復位贊禮唱俯伏興奉冊  
奉寶官率執事者舉冊寶案由中門出中陛降奉節官  
率掌節者前導至使副受冊寶褥位以案置于褥位之  
北冊東寶西掌節者脫節衣以節授奉節官奉節官搢  
笏受節以授冊使冊使搢笏跪受以授掌節者掌節者  
跪受興立于冊使之左奉節官出笏退引禮引冊使詣  
受冊褥位立定奉冊官搢笏就案取冊以授冊使冊使  
搢笏跪受冊復置于案奉冊官及冊使皆出笏退復位

引禮引副使至受寶褥位奉寶官搢笏就案取寶以授副使副使搢笏跪受寶興復置于案副使及奉寶官皆出笏退復位典儀唱鞠躬樂作四拜興平身樂止引禮引冊使押冊副使押寶掌節者前導舉案者次之初行樂作出奉天門樂止掌節者加節衣奉冊寶官皆搢笏詣案取冊寶安置龍亭中奉冊寶官退執事者舉案退儀仗大樂迎龍亭以行執節者行于龍亭之前使副行于龍亭之後迎送至中宮門外初冊寶將出門侍儀跪

奏禮畢皇帝興樂作還宮樂止引班引文武官以次出

受冊

前一日內使監官陳設皇后御座于中宮殿上如常儀  
設香案于殿庭之正中設權置冊寶案于香案之前冊  
東寶西設皇后受冊寶位于冊寶案前北向設司言司  
寶二人位于皇后位之北東西相向設奉冊寶內官位  
于冊寶案之南東西相向設讀冊寶內官位于奉冊寶  
內官之南東西相向設內外命婦位于庭下左右東西

相向又設內外命婦賀位于殿中北向尚儀二人位于皇后拜位之北東西相向司贊內官二人位于內外命婦立位之北東西相向又權設冊寶案于中宮門外設內使監令位于案之東西向設奉冊奉寶內官位于內使監令之左右稍退俱西向使副位于案南北向引禮二人位于使副之前東西相向掌節者位于冊使之後其日所司設儀仗於殿庭之東西擎執于殿上之左右樂工陳樂于殿庭之南冊寶將至中宮門尚儀奏請皇

后首飾褱衣出閣樂作至殿上南向立樂止司言司寶  
立于後及冊寶至宮門使副於龍亭中取冊寶權置於  
門外所設案上引禮引使副及內使監令俱就位立定  
次引冊使於內使監令前稱冊禮使臣某副使臣某奉  
制授皇后冊寶退復位內使監令入詣皇后殿躬言訖  
出復位引禮引內外命婦俱入就位讀冊寶內官及司  
贊內官俱就位引禮引冊使取冊授內使監令內使監  
令跪受以授奉冊內官冊使退復位引禮又引副使取

寶授內使監令內使監令跪受以授奉寶內官副使退  
復位以俟宮中行禮內使監令率奉冊奉寶官各奉冊  
寶以次入詣皇后受冊位前以冊寶各置于案冊東寶  
西尚儀引皇后降詣庭中受冊位立定侍從如常儀司  
言司寶各就位內使監令率奉冊奉寶內官取冊寶以  
次立于皇后之東西向內使監令稱有制尚儀贊拜興  
樂作皇后四拜興樂止內使監令宣制訖奉冊內官就  
案取冊授讀冊內官讀冊訖跪以授內使監令內使監

令跪以冊授皇后皇后跪受訖以授司言奉寶內官就案取寶以授讀寶內官讀寶訖以授內使監令內使監令跪以寶授皇后皇后跪受訖以授司寶尚儀贊拜興樂作皇后四拜興樂止內使監令出詣使副前稱皇后受冊禮畢使副退詣奉天殿橫街南北面西上立給事中立于冊使東北西向使副再拜復命曰奉制冊命皇后禮畢又再拜平身給事中奏聞乃退初皇后受冊寶訖尚儀引皇后陞座引禮引內命婦班首一人詣殿中



賀位初行樂作至位樂止司贊唱拜興樂作班首再拜  
興樂止跪致詞曰茲遇皇后殿下膺受冊寶正位中宮  
妾等不勝歡慶謹奉賀司贊唱拜興樂作班首再拜興  
樂止引禮引班首退復位引禮又引外命婦班首一人  
入就殿上賀位其行禮並如內命婦儀司贊唱禮畢引  
禮引內外命婦出初行樂作出門樂止尚儀奏禮畢引  
皇后降座樂作還閣樂止

百官稱賀上表箋

皇后受冊禮畢至晚內使監于奉天殿陳設御座香案  
尚寶司設寶案於香案之北侍儀司設表案位于香案  
之南又設表箋案位于丹墀北之正中設文官起居位  
于丹墀之東南西向武官起居位于丹墀之西南東向  
文官拜位于丹墀中之東北每等異位重行北向西上  
武官拜位于丹墀中之西北每等異位重行北向東上  
殿前班諸執事起居位于武官起居位之北東向侍從  
班諸執事起居位于文官起居位之北西向殿前班指

揮司官三員侍立位于丹陛上之西東向宣徽院官三員侍立位于丹陛上之東西向侍從班文官立位于殿上之東侍從班武官立位于殿上之西拱衛司官二員侍立位于殿中門之左右典牧官二員侍立位于仗馬之前東西相向受表箋內使監官一員位于丹墀表箋案之東西向宣表官一員展表官二員位于丹墀表箋案之西東向糾儀御史二人位于展表官之南東西相向典儀二人位于丹陛上之南東西相向知班二人位

于文武官拜位之北東西相向通贊贊禮二人位于知  
班之北東西相向通贊在西贊禮在東引文武班舍人  
四人位于文武官拜位之北稍後東西相向引殿前班  
舍人二人位于引武班之南東向舉表案舍人二人位  
于引文班之南西向宿衛鎮撫二人位于丹陛東西階  
下東西相向護衛百戶二十四人位于宿衛鎮撫之南  
稍後東西相向護衛千戶八人位于殿東西門之左右  
將軍二人位于殿上簾前東西相向將軍六人位于殿

門之前東西相向將軍四人位于丹陛上四隅東西相向將軍六人位于奉天門東西相向鳴鞭四人位于丹陛上之南北向其日金吾衛陳軍仗于午門外之東西陳旗仗于奉天門外之東西拱衛司陳儀仗于丹陛之東西及丹墀之東西陳車輅于丹墀之南典牧官陳仗馬于文武樓南之東西虎豹于奉天門之東西和聲郎陳樂于丹墀文武官拜位之南內使監官擎執于御座之左右侍儀司舍人舉表案入就殿上案位舍人二人

舉表案俟候于午門外文武官具朝服迎表至雲集橋  
舍人引殿前班司贊贊禮內贊宿衛鎮撫護衛鳴鞭各  
入就位侍儀侍從入迎車駕皇帝御謹身殿侍儀版奏  
中嚴御用監官奏請皇帝服袞冕文武官迎表至午門  
前置龍亭于道中禮部官取表函置于案舍人舉案禮  
部宣表官展表官押表索引丞相行文武官分班俱由  
西門入至丹墀中禮部官押表案置于丹墀正中各就  
位文武各入就起居位侍儀奏外辦導引皇帝御輿以

出仗動鼓吹振作尚寶卿捧寶前導侍衛如常儀皇帝  
陞御座樂止尚寶卿捧寶置于案將軍捲簾鳴鞭報時  
雞唱訖諸侍從官殿前班拱衛司官由西階降引班引  
同宣表官受表官受箋內官俱入起居位東西相向立  
定通贊唱某衛指揮使臣某以下起居引班唱鞠躬平  
身引班東西分引至丹墀中拜位北面立贊禮唱鞠躬  
樂作指揮以下皆再拜興樂止贊禮唱指揮使稍前指  
揮使前立贊禮唱鞠躬指揮以下皆鞠躬贊禮唱聖躬

萬福唱平身指揮使以下皆平身唱復位指揮復位唱  
鞠躬樂作指揮使以下皆再拜樂止通班唱各供事引  
班引指揮以下皆各就位通班唱具丞相銜臣某以下  
起居引班唱鞠躬平身文武官相向鞠躬平身引班東  
西分引入丹墀中拜位丞相初行樂作至位樂止知班  
唱班齊贊禮唱鞠躬樂作文武官皆四拜樂止贊禮唱  
進表箋引班引丞相及平章詣表箋案前丞相跪捧表  
興平章跪奉箋進于受箋官受箋內使監官接箋入中



宮啓聞平章興引班引復位丞相捧表興宣表官展表  
官由丹墀西陞陞西門入至殿中丞相跪進表于案退  
立于殿南正中內贊唱跪贊禮唱跪丹墀百官皆跪內  
贊唱宣表宣表官詣案取表跪讀于殿西展表官同跪  
展表宣表官宣訖俯伏興展表官以表置于案訖內贊  
與贊禮同唱俯伏興平身丞相與丹墀百官皆俯伏興  
平身與宣表展表官由殿西門出西階降復位贊禮唱  
鞠躬樂作百官皆四拜興平身樂止贊禮唱搢笏三舞

蹈跪山呼萬歲山呼萬歲者三出笏俯伏興樂作四拜  
平身樂止贊禮唱禮畢侍儀奏禮畢鳴鞭皇帝興樂作  
導引還謹身殿樂止舍人舉表案出引班引文武官以  
次出

謁廟

皇后將謁太廟皇帝先遣官用牲牢行事告以皇后將  
祇見之意其儀與時享同祝文臨時撰定遣官之日皇  
帝降香告官奉香至太廟告畢皇后親行謁見前期皇

后齋三日內外命婦及執事內官各齋一日前一日執事官灑掃廟庭內外設皇后拜位于廟戶外又設拜位于廟中香案前俱北向設內命婦陪祀拜位于廟庭之南北向設外命婦陪祀拜位于內命婦之南司贊位于皇后拜位之東西司賓位于內命婦之北東西相向司香位于香案之右設盥洗位于庭階之東司盥洗官位于位所各廟皆如前儀其日清晨宿衛陳兵衛樂工備樂尚儀備儀仗及重翟車于中宮外門之外陪祀外命

婦各具翟衣集于中宮內門之外內使監官奏中嚴皇后服首飾九龍四鳳冠褱衣尚儀奏外辦導引皇后出內宮門司贊奏陞輿皇后陞輿至外門之外司贊奏降輿皇后降輿司贊奏陞車皇后陞車宿衛兵仗前導鼓吹設而不鳴次尚儀陳儀衛次外命婦次內命婦皆乘車前導次皇后重翟車內使監人員扈從宿衛復陳兵仗于後皇后至廟門司賓引內外命婦先入就殿庭東西侍立司贊奏請降車皇后降車司贊引自左門入就

位北向立司賓引內外命婦各就位北向立司贊司賓  
各贊拜皇后及內外命婦皆再拜興司贊奏請行事請  
詣盥洗位引皇后至盥洗位奏盥洗司盥洗者酌水皇  
后盥手訖奏悅手司巾以巾進皇后悅手訖司贊奏請  
詣神位前引皇后由東階陞至神位前北向立司贊奏  
上香者三司香奉香進于皇后之右皇后三上香訖司  
贊引皇后復位司贊司賓各贊拜興皇后及內外命婦  
皆再拜興司贊奏禮畢引皇后出自廟之左門司賓引

內外命婦出司贊奏陞車皇后陞車宿衛陳儀仗樂工  
陳樂尚儀陳儀仗內外命婦前導侍從如來儀過廟鼓  
吹振作還至宮之外門外司贊奏降車皇后降車司贊  
奏陞輿皇后陞輿至宮之內門外司贊奏降輿皇后降  
輿入宮皇后受冊畢皇帝會群臣于謹身殿皇后于中  
宮會內外命婦其儀皆如正旦宴會之儀

永樂初續定

先期三日齋戒遣官祭告天地宗廟用香幣酒脯行一

獻禮前一日禮部同鴻臚寺官設詔案于奉天殿中節冊寶案于詔案之南節案居中冊東寶西設節冊寶綵輿于丹陛之東尚寶司設寶案教坊司設中和韶樂及大樂至日早錦衣衛官設鹵簿大駕內官設皇后受冊位于宮中及設節冊寶案節案居中冊東寶西設香案于節案之前設內贊二人引禮二人設女樂于丹陛之上上具冕服御華蓋殿翰林院官以詔書用寶訖鴻臚寺官奏執事官行禮畢奏請陞殿如常儀文武百官具

朝服行叩頭禮左右侍班正副使入就拜位贊鞠躬樂作四拜興樂止傳制官跪奏傳制俯伏興執事官舉節冊寶案由殿左門出置御道中傳制官由左門出西向立稱有制贊正副使跪制曰某年某月某日冊妃某氏為皇后授以冊寶命卿等持節行禮贊俯伏興樂作四拜禮畢樂止執事官舉節冊寶置綵輿中黃蓋遮送樂作至奉天門樂止儀仗鼓樂迎節冊寶至右順門外正副使朝北立內官捧節冊寶由正門入女樂導迎節冊



寶未至之前引禮請皇后具禮服宮人侍衛以俟節冊  
寶將至引禮導皇后出迎于宮門外節冊寶至由正門  
入皇后隨至拜位內官以節冊寶各置于案樂作內贊  
贊四拜樂止贊宣冊贊跪宣冊女官取冊立宣于皇后  
之左宣訖贊受冊贊搢圭宣冊女官以冊跪授皇后受  
訖以授女官女官跪受于皇后之右立于西贊受寶其  
授受一如冊贊出圭贊興樂作內贊贊四拜樂止禮畢  
內官持節由正門出皇后出送于宮門外內官至右順

門以節授正副使報禮畢正副使得報持節復命翰林院官以詔書授禮部官禮部官捧詔書于承天門開讀如常儀皇后受冊畢內官先具謁告儀物翰林院官具謁告文上率皇后皆具服詣奉先殿行謁告禮如常儀謁畢皇后具服于內殿俟上具皮弁服陞座贊引女官導皇后詣上前就拜位行謝恩禮樂作八拜樂止贊禮畢還宮是日內官設皇后座于宮中南向設諸親諸命婦拜位于丹墀內北向設儀仗女樂設內贊二人引禮

二人引禮導長公主公主及親王妃侯皇后具服陞座  
引禮引詣皇后前行八拜禮次引六尚等女官行禮如  
之次引四品以上外命婦行四拜禮贊跪內贊跪致詞  
云妾某氏等恭惟皇后殿下榮膺冊命正位中宮禮當  
慶賀致詞畢贊俯伏興平身四拜禮畢次日文武百官  
上表命婦上箋稱賀如常儀

天順八年續增謁告謝恩慶賀儀

上具冕服皇后具禮服上率皇后詣奉先殿行禮畢詣

英宗皇帝几筵前行謁告禮如常儀謁告畢上復率皇后詣兩宮皇太后前俱行八拜禮畢然後皇后于內殿俟上服皮弁服陞座贊引女官引皇后詣上前行八拜謝恩禮畢還宮其慶賀儀皇后受賀畢親王于上位前行慶賀禮如常儀次詣兩宮皇太后前俱行八拜禮畢次詣皇后前行八拜禮又三日女官預陳設慈懿皇太后御座于宮中設香案于丹墀之南其日清晨內官陳設儀仗于丹陛之東西及丹墀東西女官擎執者立于

御座之左右陳內樂于丹陛東西北向設表案于殿東門外設班首拜位及各命婦拜位于丹墀北向設司贊位于丹墀東西設司賓位于命婦之北東西相向設內贊二人于殿內東西命婦至宮門外司賓引命婦入就拜位女官具服侍班如常儀尚宮尚衣等官詣內奉迎尚儀奏請陞座慈懿皇太后具禮服出導從如常儀樂作陞座樂止司贊唱班齊樂作贊四拜樂止外贊唱進表引表案女官前導舉表案女官二人由殿東門入樂

作至殿中樂止贊衆命婦跪內贊唱宣表目女官宣訖  
興唱宣表展表女官詣案前取表宣訖興舉案者舉案  
置于殿東贊命婦皆興司贊唱拜樂作四拜樂止尚儀  
跪奏禮畢慈懿皇太后興樂作還宮樂止慶賀皇太后  
禮同

成化二十三年冊立禮同惟樂設而不作

皇妃冊立儀

洪武三年定

前期一日禮部官奉冊印進入置于謹身殿御座寶案之前冊東印西侍儀司設冊禮使受制位于奉天殿橫街之南稍東副使位于其西俱北向設承制官奉節官奉冊官奉印官位于副使之東北西向以北為上設副使受冊受印褥位于受制位之北南向以俟冊使受冊副使受印設典儀二人位于丹陛上之左右傳贊二人位于丹陛下之左右文武官對立位于丹墀兩旁引班四人位于文武官之北贊禮二人位于冊使位之北皆

東西相向所司置龍亭于奉天門外正中設儀衛鼓吹以俟迎冊印行內使監令設使副位于內宮門之外北向東上設內使監令位于冊使之東北西向設贊者二人位于冊使之北東西相向設冊印案于贊者之北冊東印西內使設妃受冊位于本位庭中北向設冊印案于妃受冊印位之北冊東印西設內命婦諸親賀位于庭階之南北向又設妃受賀位于其宮之中南向設內贊二人位于妃受冊位之北設引禮二人位于內贊之



南皆東西相向其日質明文武百官皆朝服引班分引序立于奉天殿丹墀之兩旁東西相向贊引引使副公服入就橫街南位北面立承制官奉節奉冊奉印官及掌節者皆入詣謹身殿外北向立以俟內臣傳旨訖掌節者持節奉冊官奉印官率執事者舉冊印案以行奉節官掌節者前導次冊案奉冊官後從次印案奉印官後從承制官押其後至橫街南以案置于使副受冊褥位之北冊東印西承制官奉節官奉冊奉印官各就位

西向立掌節者持節立于奉節官之左差退典儀贊使副皆再拜承制官詣使副前稱有制典儀贊使副跪承制官宣制曰妃某氏特封某妃命卿等持節展禮宣制訖復位典儀贊使副再拜奉節官率掌節者持節詣冊使前掌節脫節衣以節授奉節官奉節官以節西向授冊使冊使跪受以授掌節者掌節者受節立于冊使之左奉節官退復位贊禮引兩使詣受冊褥位立奉冊官于冊案上取冊授冊使冊使跪受冊興置于案奉冊官

及冊使各退復位贊禮引使副詣褥位北向立奉印官于印案上取印西向授使副使副跪受印訖興置于案奉印官及使副俱退復位典儀傳贊贊使副皆再拜典儀唱禮畢執事者舉冊印案出奉天門外奉冊奉印官取冊印置龍亭中奉冊奉印官退贊禮引冊使押冊副使押印持節者前導儀衛鼓吹以次出引班引文武百官退冊印將至內宮門外內使請妃服花釵翟衣引出閣至本位宮中南向立及冊印至使副于龍亭中取冊

印權置于門外所置案上訖引禮內使引使副及內使  
監令俱就位立次引冊使于內使監令前稱冊禮使某  
副使某奉制授某妃冊印退復位內使監令入詣妃本  
位庭中躬言訖出復位引禮引內命婦諸親俱入就位  
引禮引冊使詣內使監令前冊使取冊以授內使監令  
內使監令跪受以授內執事引禮又引副使取印以授  
內使監令內使監令跪受以授內執事率執事者奉冊  
印以次入詣妃受冊位前各置于案冊東印西引禮引

妃降詣庭中受冊位立侍從如常儀內使監令率內執事取冊印以次立于妃之東西向內使監令稱有制內贊贊妃四拜內使監令宣制訖執事者取冊授內使監令跪讀冊訖以冊授妃妃跪受冊以授內執事執事者取印跪授妃妃跪受印以授內執事內贊贊妃四拜內使監令出詣使副前躬稱妃受冊印禮畢使副還復命引禮引妃升階就位南向坐引禮引內命婦諸親以次賀如常儀禮畢引禮引內命婦退內使監令引妃謝皇

帝皇后並如宮中之儀其皇妃服九輦四鳳冠翟衣九等車輅用厭翟車冊用鍍金銀冊二片其長短濶厚與諸王冊同冊盞飾以渾金灑粉蟠鳳其物用裏覆皆與諸王同印用金龜鈕其尺寸與諸王寶同文曰皇妃之印其餘制度皆與諸王同匣皆飾以蟠鳳皇妃有寶餘無寶

永樂七年續定儀

其日質明錦衣衛設鹵簿大駕教坊司設中和韶樂及

大樂鴻臚寺設節冊案于奉天殿內設正副使拜位于丹墀內官設皇妃受冊位于各宮中設節冊案于皇妃受冊之北又設香案于節冊案前設內贊二人引禮二人上御華蓋殿具皮弁服鴻臚寺官奏執事官行禮畢奏陞殿導駕官導上陞座文武百官具朝服入班行叩頭禮侍班正副使入班就拜位贊四拜興傳制官奏傳制俯伏興執事官舉節冊案由殿左門出置御道中傳制官由左門出稱有制贊正副使跪制曰永樂七年某

月某日冊某氏為某妃命卿等持節行禮贊俯伏興四拜禮畢執事官舉節冊案由御道東出黃蓋遮送至奉天門外用鼓樂迎至右順門外正副使朝北立內官捧節冊正門入迎至各皇妃宮中節冊將至引禮請皇妃具禮服宮人各執扇衛從出迎于宮門外節冊至皇妃隨至拜位內官以節冊各置于案內贊贊四拜贊宣冊贊跪女官捧冊立宣于皇妃之左宣畢贊摺圭贊授冊女官跪授皇妃皇妃以授女官跪受于皇妃之右贊興



內贊贊四拜禮畢內官持節出皇妃送出宮門外內官  
出報正副使禮畢各宮行禮俱同正副使得報持節復  
命是日皇妃受冊畢內官先具祭儀翰林院具祭文上  
具服皇妃各具妃服上率皇妃詣奉先殿行謁告禮如  
常儀謁廟畢皇妃各具妃服女官引詣上前行八拜禮  
畢還宮

明會典卷四十五